



Ofisa o le Pule Faatonu

Lipoti Faaletausaga

mo le piliota na faamaeaina i le aso 30 Iuni 2010

Folasaga

O lenei Lipoti Faaletausaga o loo folasia atu ai le tele o galuega faatino a le Ofisa o le Pule Faatonu i totonu o le tausaga o loo iloiloina nei.

O le matafaioi o le **Vaega o Tupe ma Pulega** o le fetuunai ma faatulaga lelei matafaioi a vaega taitasi e aofia ai; Vaega o Tupe ma Pulega, Vaega o Tulafono, Vaega o Alaleo ma le Faainisinia ma le Vaega e Mataituina Auaunaga ina ia mautinoa ma manino lelei le faatinoina o galuega.

Ua mautū ma mausali lelei le Faalapopotoga ina ua filifilia Faauluuluga o Vaega e tolu (3), o le tofiaina o le Ofisa Tausitusi ma le Ofisa Lagolago. Ae ua avanoa ai ma le tulaga o le Ofisa Sinia a le Vaega e Mataituina Auaunaga ona ua faamavae lē sa iai i lea tofiga.

O le sini autū ma le faamuamua a le Ofisa o le faamalositia ma siitia le tomai o le aufaigaluega e ala i aoaoga ina ia faaaupagaina i tomai ma agavaa mo le faatinoina o galuega. E auina atu i aoaoga faapitoa i atunuu i fafo ma a toe foi mai o le a faasoa atu i nisi o le aufaigaluega.

Ua iai le faamoemoe o le Ofisa o le Pule Faatonu ina ia siitia ma faaleleia ana fesootaiga ma le mamalu o le atunuu e ala atu i le upegatafailagi ma nisi auala o fesootaiga.

O se vaega taua o tapenaga a le Ofisa o le atinaeina lea o se Fuafuaga Autasi mo le Ofisa i le isi tausaga a sau nei.

O se galuega sa taulai ai le vaai ma agai ai le faamamafa o le tapenaina lea o se Auivi faa-le-tulafono, ma o se galuega na saunia lelei mo le ausiaina lea o le iai o se **Vaega o Tulafono**.

O nisi o luitau faa-le-tulafono i lenei tausaga faaletupe e aofia ai le faauluina i le faamasinoga o le talosaga a le Digicel (Samoa) e toe iloilo ai le faaiuga a le Komiti o Faamasino mo Fesootaiga aemaise o le talosaga apili e teena ai nisi o poloaiga a le Pule Faatonu.

Ua siitia i se tulaga maoa'e laisene e afua mai i faatalatalanoaga o taiala ma aiaiga o laisene aemaise o le taulamua i le mataituina o Kamupani e ulufale mai i le Maketi o Fesootaiga. O nei laisene e aofia ai laisene o fesootaiga o loo faataoto i le alititai (Submarine Cable), laisene faavaomalo (International Gateway) ma le laisene i fesootaiga tuusao (Fixed Services).

O poloaiga ma tulafono na faamatuu atu i le gasologa o lenei tausaga faaletupe o loo aiaia ma faamauiina ai fesuiaga o tau totogi mo fetaulaiga o laina o fesootaiga (Interconnection Charges), aemaise o le toe iloiloina o tau totogi mo fetaulaiga o laina o fesootaiga.

Ua lima nei tausaga o le Tulafono o Fesootaiga ma ua faamauina le agavaa pea i le faatinoina o galuega ae o loo siitia pea fesuaiga o faamatalaga. O nisi o fesuaiga e aofia ai le faasa’oina o faamatalaga o upu, faamatalaina o auaunaga o fesootaiga, o le faamaninoina o malosiaga a le Pule Faatonu, o le faamautinoina o gaioiga mo talosaga apili e teena ai poloaiga a le Pule Faatonu aemaise o le uunaia lea o galuega a le Komiti faa-faamasino.

O galuega faasuetusi a le **Vaega o Inisinia ma Fusi o Alaleo** aua le mataituina o le faaaogaina o alaleo ma le talitonuga e le gata i le puleaina lelei o lona faaaogaina a o aga talafeagai e manaomia e vaega eseese.

O galuega faatino mo i latou o loo faaaogaina fusi o alaleo ua faatulafonoina ma ua laiseneina e tusa ai ma aiaiga o faiga faavae fou e pei ona iai. O faiga faavae fou ua maea tapenaina o le Faiga Faavae mo le Puleaina o Fusi o Alaleo ma le Fuafuaga mo Fesootaiga i taimi o Faalavelave Faafuasei.

O galuega mataitu o fusi o alaleo ua avea ma matafaioi tauave i le faiga faavae fou mo le iloiloina o alaleo o televise aemaise o se alafua e lima taitaiina ai le puleaina o fusi o alaleo. O le mama ma le talafeagai o le faaaogaina o fusi o alaleo, o le saoloto mai felavasaiga o alaleo o se miti faamoemoeina lea a lenei vaega.

O galuega faasuetusi mo fuainumera ua maea nei ma o le a fesoasoani i le atinaeina o se fuafuaga faataoto aua le faaleleia o se Fuafuaga o Numera mo Samoa.

E fa sefulu tolu (43) laisene fou na faamatuu atu i le gasologa o feau o lenei tausaga faaletupe aemaise laisene o alaleo o leitio ma o le a faatupulaia pea.

O le tapenaina e le Vaega o Inisinia o le Faiga Faavae mo le Puleaina o Fusi o Alaleo ina ia mautinoa le faatinoina o le fuafuaga ma faamaonia ai le mama o fusi o alaleo aemaise o le manino o alafua mo le iloiloina o alaleo. O le faatulagaina o alaleo ua atagia mai le faatupulaia o lona faaaogaina ma o se vaaiga lelei lea i le lumanai i se isi tekonoosi fou e pei ona fuafuaina le 4G mo fusi o alaleo.

Ua taulai nei le faamamafa i galuega faatino mo vaega o faasalalauga i le leitio ma le televise ina ia faaleleia auaunaga e ofoina atu i Samoa. O le Faiga Faavae fou mo taiala ma alafua: o le Suesueina o Alaleo mo Televise i totonu o Samoa sa folasia i le lipoti faaletausaga 2007/2008 ma ua siitia le faaleleia o auaunaga ae ua alagatatau ma talafeagai ai le auai o Faasalalauga o se vaega e faatonutonu faa-le-tulafono e le Ofisa o le Pule Faatonu e ese mai i vaega o laisene o le a faailoa i le isi tausaga faaletupe.

O se faamanatu ma se fafagu taua foi mo le Ofisa o le Pule Faatonu le galuafi e pei ona aafia ai le itu i Saute o Upolu ia Setema 2009 ina ia amata mea i le atinae ma fausia se **Fuafuaga mo Fesootaiga i taimi o Faalavelave Faafuasei**. O lenei Fuafuaga o le a faailoa atu ai aafiaga le manuia o fesootaiga i nisi o faalavelave faalenatura i taimi ua mavae ae peitai i le gasologa o faatalatalanoaga ua folasia ai le

tulaga lelei o faataitaiga mai atunuu faavaomalo mo le tapenaina o lea fuafuaga. O le faatinoina o lenei fuafuaga o loo manaomia ai le galulue sootauau o Matagaluega e fitoitonu iai lenei atinae aemaise le fesosoani a nisi o faalapotopotoga ao le laasaga taua lava o le uunaia ma faamalosia le faaleleia o auala e tali atu ai i faalavelave faalenatura.

Ua maitauina le tulaga faaletonu o nisi o meafaigaluega e mataituina ai auaunaga ma ua latalata foi ina le toe faaaogaina. O le faamoemoe o le Ofisa o le Pule Faatonu ina ia faia iai ni galuega faaleleia i masini aemaise o le manaomia ai o nisi masini faaopoopo mo galuega faatino.

O faaiuga e foia ai felavasaiga o laina o fesootaiga o se matupu ogaoga ma le taua o loo feagai ma le Vaega o Inisinia. O le felavasaiga o laina i pou faasalalau, e pei ona iai i le Mauga o Fiamoe o se faafitauli matuia i le aafia ai o le soifua ma le ola. Ua maea ona foia nei faafitauli ma ua faataoto foi ni auala e foia ai ina ia le mafai ona toe tupu. O se tasi o vaega taua mo faasalalau o le iai lea ose atinae e faasoina ai le faaaogaina o pou faasalalau i se tulaga lelei.

Ua faamalosia ma siitia galuega faatino a le **Vaega e Mataituina Auaunaga** ma le vaaiga o i latou o loo faaaogaina auaunaga (consumers) ina ua tofia le Faauluuluga ae peitai ua iai i se tulaga pagatia i le faamavae ai o le na avea ma Ofisa Sinia. O le faamuamua a lea vaega o le foia o mataupu tuua faa-le-tulafono ua leva ona faamauiina a o le i tatalaina le maketi o fesootaiga.

O le faamamafa i lenei tausaga faaletupe o le tapenaina lea o taiala ma alafua e foia ai faafitauli ma faitioga aemaise o le atinaeina o se Faiga Faavae mo Avanoa Lautele mo Auaunaga o Fesootaiga.

O le tasi o faamanuiaga sa molimauina e lenei vaega o le iai lea i le faatuina o ni tau faavae mo fetaulaiga o laina o fesootaiga aemaise o le faamaeaina o se aoaoga mo nei tau faavae ae mulitai ai le faia o le poloaiga mo tau totogi o auaunaga o fesootaiga. O le faamoemoe taualuga ia mautinoa le oo atu o nei tau maualalo ia i latou o loo faaaogaina auaunaga.

O le **Faiga Faavae mo Avanoa Lautele** sa faia iai faatalatalanoaga ma fesufiaiga ma ua tuuina atu i le Minisita mo le faamaoniga. O vaega o le faatinoina o lenei faiga faavae o le a faamuamua i le isi tausaga a sau nei.

O le tapenaina ma le atinaeina o se Faiga Faavae mo Faiga Faatauvaga i Fesootaiga faatasi ma faatalatalanoaga o le a faatinoina i le isi tausaga faaletupe.

O le **Iloiloina o le Tala Faatatau o le Tupe** a le Ofisa ole Pule Faatonu o loo atagia ai le lelei o le faatinoina o galuega ma faamaonia ai e le Malo le \$1,370,000 e faamatu'u mai e faaaoga ma le faagaioiga o le Ofisa; ma o tupe maua na fuafuaina e \$2,181,000. Na faamauiina tupe maua na aoina e le Ofisa e \$2,599,197 e aofia ai le

\$1,369,999 na tuuina mai le Malo e pei ona faamaoniaina i le tala faatatau o le tupe ma le tupe faaalu e \$3,566,464 e aofia ai le \$2,026,096 na aoina mai i laisene ma tuuina atu i le Malo. Ua faamauina e le Ofisa ole Pule Faatonu se tupe pa'u e (\$967,267) e afua mai i le tele o le tupe e aoina e le Ofisa ma tuuina atu i le Malo ae laititi se vaega tupe e faamatuu mai e le Malo mo le faatinoina o galuega.

O le Fuafuaga mo le Tausaga Faaletupe 2010-2011 o loo faamamafa lava i le uunaia ma faamalosia galuega faatino a le Ofisa, o le siitia o tomai ma agavaa aemaise o le malupuipua o faamaumauga a le Ofisa. O vaega taua o le talosaga e aofia ai:

- i. **Vaega o Tupe ma Pulega** o le tapenaina o se Fuafuaga Mamao, Fuafuaga Autasi faatasi ai ma le fuafuaga o le gasologa o galuega ina ia faailoa ai le auiliiliina o punaoa a le Ofisa. O nisi o matafaioi o le a ave iai le faamuamua o le faia lea o se isi nofoaga mo le ofisa aemaise galuega faatino mo Vaega o Meli ma Faasalalauga.
 - ii. **Vaega o Tulafono** o le a siitia e ala i le faaleleia o le Tulafono o Fesootaiga ma le faalauiloaina o nisi Tulafono fou. O le a atinae Tulafono Faatonutonu mo faiga faatauvaga ma le fetaulaiga o laina o fesootaiga aemaise le faaleleia o le Tulafono Faatonutonu mo leitio. O auala e foia ai feeseeseaiga o le a avea ose galuega autu i fuafuaga o galuega.
 - iii. **Vaega o Alaleo ma le Faainisia** o le a faamae'a ai le Faiga Faavae fou mo le Puleaina o Fusi o Alaleo aemaise lona faatinoina ma le manatu autu e agai i le vaevaeina o fusi o alaleo faatasi ma lona totogi. O le faaogaina o le 700MHZ ua alagatatau ai ona faailoa se isi tekonolosi fou e pei ona iai le 4G ma o le a avea ma faamuamua i le gasologa o galuega.
- O le faatinoina o le Fuafuaga mo Fesootaiga i taimi o Faalavelave Faafuasei o se tasi o galuega taua i le vaega o Inisia ina ia ogatasi ma nisi o fuafuaga fou ma faiga faavae mo Fusi o Alaleo, Fuainumera ma Galuega Tetele.
- iv. **Vaega e Mataituina Auaunaga** o le a taulai le faamuamua i le faamaeaina o le Faiga Faavae mo Faiga Faatauvaga i Vaega o Fesootaiga e ala i le iloiloaina o maketi, o le pule tutoatasi mo le tuuina atu o se auaunaga, aemaise o mataupu faasolitulafono i taimi o tauvaga.

O le faatinoina o le Faiga Faavae mo Avanoa Lautele ma le faatonutonuina o feeseeseaiga o le a aofia i le fuafuaga o galuega ina ia ogatasi ma le atinaeaina o se taiala e faamaonia ma iloiloaina ai tau mo fesootaiga.

Faasologa

1	UPU TOMUA	9
2	VAEGA O TUPE MA PULEGA	11
2.1	Aufaigaluega	11
2.1.1	Tofiga	11
2.1.2	Faamavae mai le tofiga o le Ofisa Sinia – Tagata Lautele	11
2.2	Avanoa Faigaluega Faatulagaina	12
2.3	Aoaoga ma le Faaleleia o le Tomai o le Aufaigaluega	13
3	VAEGA TAU TULAFONO	15
3.1	Lu’itau tau tulafono	15
3.2	Laisene.....	16
3.3	Fa’atonuga ma Poloaiaga	17
3.4	Iloiloga o le Tulafono o Fesootaiga	17
4	VAEGA O ALALEO MA LE FAAINISINIA.....	19
4.1	Laisene mo le faaaogaina o Alaleo.	19
4.2	Puleaina o le Fusi o Alaleo	20
4.2.1	Vaevaega o Alaleo.....	21
4.2.2	Mataituina o Alaleo	22
4.2.3	Faiga Faavae mo le Faasoasoina ma le Faaaogaina o Alaata i Televisi.	22
4.2.4	Faiga Faavae Puleaina o Fusi o Alaleo	23
4.3	Faannumeraina o Telefoni.....	23
4.4	Fuafuaga o Fesootaiga I Taimi o Faalavelave Faafuasei (NETP)	24
4.5	Masini e Faaaogaina i Fesootaiga	24
4.6	Felavasaiga o alaleo ma alaata	26
5	VAEGA E MATAITUINA AUAUNAGA	29
5.2	Fetaulaiga o Laina tau Fesootaiga	29

5.3	Tau ma le Faatulagaina o Totogi o Telefoni	30
5.4	Avanoa Lautele.....	30
5.5	Faitioga a Tagata o lo o Faaaogaina Auaunaga.....	30
6	ILOILOGA O VAEGATUPE.....	32
6.1	Alagatupe	32
6.1.1	Tupe Maua mai Laisene mo auaunaga tau Feso’otaiga	32
6.1.2	Tupe maua mai Laisene tau Alaleo	32
6.2	Tupe Faaalu	33
6.3	Lipoti a le Suetusi	34
7	FUAFUAGA FAATAATITIA MO LE TAUSAGA FAALETUPE 2010-2011	35

Pepa Fa’apipi’i A: Resitala o Laisene tau Fesootaiga

Pepa Fa’apipi’i E: Resitala o Laisene tau Alaleo

Pepa Fa’apipi’i I: Lipoti a le Suetusi

1 Upu Tomua

E tele galuega faatino sa feagai ma le Ofisa o le Pule Faatonu i le piliota e afua mai ia Iulai 2009 e oo atu ia Iuni 2010 aua se taumafai e foia luitau sa feagai ai ae faapea foi ma le faamae'aina o ni mataupu sa totoa mai le tausaga ua tuana'i atu nei.

O lenei lipoti faaletausaga ua tuuina atu i ni vaega se fitu, e aofia ai lenei Faamatalaga Tomua e faaataata atu ai le faatulagaina o le Ofisa o le Pule Faatonu faapea ma ni pepa o faamatalaga faaopoopo o lo'o faapipiina atu.

O le **Vaega o Tupe ma Pulega** o lo'o faamatala auililiina ai galuega lagolago aua le faaleleia o le Ofisa ina ia faataunuuina le gasolo lelei o le faatautaia o galuega ma tiute a le Ofisa. O lo'o ave le faamamafa i le aufaigaluega, avanoa faigaluega faatulagaina faapea le faamalositia o le siitia o tomai a le aufaigaluega.

O le **Vaega tau Tulafono** o lo'o lipotiaina ai ni lu'itau faa-le-tulafono na feagai ai ma le Ofisa, laisene, faatonuga ma poloaiga a le Pule Faatonu faapea ma le iloiloga o le Tulafono o Fesootaiga.

O le **Vaega o Alaleo ma le Faainisinia** o le a faailoaina atu ai le tulaga ua iai nei laisene tau alaleo, o faafitauli o lo'o feagai ai i le puleaina o alaleo ma le faanumeraina o telefoni. O lo'o faamatalaina atu ai foi le tulaga ua iai le fausiaina o le Fuafuaga o Fesootaiga i le taimi o Faalavelave Faafuasei faapea ma le toe faaleleia o le faafitauli i felavasaiga o alaleo o loo totoa.

O le **Vaega e Mataituina Auaunaga o Fesootaiga** o le a faamatalaina ai mataupu e le i faamae'aina, o tau totogi mo fetaulaiga o laina o fesootaiga, faapea tau ma le faatulagaina o totogi o telefoni. O le Faiga Faavae mo Avanoa Lautele ua maea ona tuuina atu i le Minisita ma ua mae'a foi ona faataatia fuafuaga mo le faatinoina o galuega a le ofisa pe a faao'o mai ni faitioga mai tagata o lo'o faaaogaina auaunaga.

O le **Iloiloina o Vaegatupe** e faamatala auilili atu ai tupe maua mai auaunaga tau fesootaiga faapea ma laisene tau alaleo. E tuuina atu foi ma faamatalaga i tupe faaaoga i le lipoti a le Suetusi.

Ua faamatalatala atu foi **Fuafuaga Faataatitia mo le tausaga faaletupe 2010 i le 2011** ae maise ni galuega ua tataua ona amataina faapea ma tupe faaaoga e manaomia ai.

O **Pepa Faapi'i** e aofia ai le Resitala o Laisene tau fesootaiga, Resitala o Laisene tau Alaleo ma le Lipoti a le Suetusi.

2 Vaega o Tupe ma Pulega

O le Vaega o Pulega ma Tausitusi a le Ofisa o le Pule Faatonu e tuufaatasia ai galuega lagolago uma e manaomia e le Ofisa. E aofia ai le pulega ma galuega tau atinaeina ma le faaleleia o tagata faigaluega.

2.1 Aufaigaluega

E toa sefulu (10) le aufaigaluega a le Ofisa o le Pule Faatonu i le aso 30 o Iuni 2010 e pei ona taua i lalo:

Pule Faatonu: Donnie De Freitas

Loia: Elisa Kohlhase

Faauluuluga – Vaega o Alaleo ma le Faainisinia: Unutoa Auelua-Fonoti

Faauluuluga – Vaega e Mataituina Auaunaga o Fesootaiga: Karen Komiti

Ofisa Sinia - Alaleo ma le Faainisinia: Tuuaga Aviata

Ofisa Sinia - Alaleo ma le Faainisinia: Eteuati Eteuati

Ofisa Sinia – Pulega ma Tausitusi: Faalelei Sua

Ofisa Tausitusi: Etenauga Tanielu

Talitelefoni/Failautusi: Leleiga Karene

Ave Taavale: Pio Bell

2.1.1 Tofiga

Na mafai ona faatumutumuina uma avanoa faigaluega o Faauluulu o Vaega i totonu o le Ofisa i lenei piliota.

Na tofiaina Unutoa Auelua-Fonoti i le Faauluuluga o le Vaega o Alaleo ma Faainisinia e afua mai i le aso 10 Aokuso 2009. Ae filifilia Elisa Kohlhase ma Karen Komiti i avanoa o le Loia ma le Faauluuluga o le Vaega e Mataituina Auaunaga o Fesootaiga; o ia tofiga na afua mai i le aso 17 Aokuso 2009.

Na tofia i le aso 11 Aokuso 2009 Etenauiga Tanielu i le Ofisa Tausitusi ae o Leleiga Karene ua tauaveina nei galuega tau Talitelefoni/Failautusi e afua mai i le aso 8 Iuni 2010.

2.1.2 Faamavae mai le tofiga o le Ofisa Sinia – Tagata Lautele


E le i iai se tagata faigaluega i le avanoa o le Ofisa Sinia – Tagata Lautele i le mae’a ai o le piliota lenei ina ua faamavae le Susuga ia Faafetai Ah Kuoi aua le faalauteleina

o le tomai. Na faamavae o ia i le aso 26 Mati 2010 ma ua faamoemoe le Ofisa o le Pule Faatonu e amata ona faasalalau lenei avanoa faigaluega i le amataga o le tausaga o muamua.

2.2 Avanoa Faigaluega Faatulagaina

O le faatulagaina o avanoa faigaluega na toe iloiloaina ma ua atagia ai le tulaga ua iai nei i le aso 30 Iuni 2010. E faailoa atu foi, ua faatumuina uma avanoa faigaluega a le Ofisa e vagana ai le avanoa faigaluega o le Ofisa Sinia – Tagata Lautele

O avanoa faigaluega faatulagaina o le Ofisa o lo’o fa’amanoina atu i le Ata 2.1.



Ata 2.1: Avanoa Faigaluega faatulagaina o le Ofisa o le Pule Faatonu

O lenei faatulagaina o le a toe iloiloaina ina ia atagia ai ni vaega se fa e aofia ai le Vaega Tau Tulafono. E atagia ai foi le avanoa o le Loia ina ia tutusa ma isi Faauluuluga o Vaega o loo iai nei. O lenei suiga o lo’o fuafuaina mo le tausaga 2010-2011.

2.3 A'oa'oga ma le Faaleleia o le Tomai o le Aufaigaluega

Na mafai ona auai atu le aufaigaluega a le Ofisa o le Pule Faatonu i ni polokalame faa-le-aoaoga e pei ona fuafuaina mai i le tausaga faaletupe ua tuanai nei ina ia faamautinoaina ai le faaaupagaina o le aufaigaluega uma i tomai eseese e manaomia i le faatinoina o a latou galuega.

Na ave foi le faamamafa i polokalame faa-le-aoaoga mo faauluuluga o vaega e tolu ina ia mautinoa le faaauauina o galuega uma a le Ofisa i se tulaga maua pe a maea ai le feagaiga na sainia ma le Pule Faatonu o iai nei i le tausaga 2012.

O avanoa mo ni aoaoga sa maua mai i le Iuni of Fesootaiga a le Lalolagi faapea ma le Poloketi a le Faletupe o le Lalolagi.

Na mafai ona auai atu le Pule Faatonu i se polokalame faaleaoaoga a le Iuni o Fesootaiga a le Lalolagi mo tau i le fetaulaiga o fesootaiga mo atunuu o le Pasefika, sa faia i Aukilani Niu Sila mai le aso 20-24 Iulai 2009, ma sa auai atu foi i le aoaoga mo le talanoaina o Faiga Faavae mo Feso'otaiga ma Faamatalaga Televavave, sa faia i Nukualofa, Tonga mai le aso 14-15 Iuni 2010.

O polokalame faa-le-aoaoga nei na auai ai le aufaigaluega i lenei piliota:

Na auai atu Tuuaga Aviata i le Uluai aoaoga a le Iuni o Fesootaiga a le Lalolagi ma le Faalapotopotoga o Vaai Tau a le Lalolagi i le faaaogaina o alaleo mo le Vaai Tau sa faia i Sineva, Suiselani i le aso 16-18 Setema 2009.

Sa ia auai atu foi i le aoaoga a le Iuni o Fesootaiga a le Lalolagi i le Faaaogaina o se Polokalame komipiuta mo galuega tau pulega o alaleo mo atunuu o le Pasefika, sa faia i Suva, Fiti mai le aso 25-27 Iuni 2010 faapea foi ma se aoaoga sa faia i Kalefonia, Amerika mai le aso 3-7 Me 2010 e faatatau i le faaaogaina o masini mo le mataituna o alaleo ma alaata.

Na auai atu Faafetai Ah Kuoi i le aoaoga a le Iuni o Fesootaiga a le Lalolagi i mataupu tau Avanoa Lautele aua le faaooina o auaunaga tau telefoni ma initeneti sa faia i Bangkok, Thailand i le aso 12-15 Oketopa 2009.

O Eteuati Eteuai na mafai ona auai atu i le aoaoga a le Iuni o Fesootaiga a le Lalolagi i mataupu tau pulega o alaleo mo lenei itulagi Asia ma le Pasefika na faia i Shanghai, Saina mai le aso 2-6 Novema 2009.

Na auai atu Faalelei Sua i se aoaoga i le faaaogaina o metotia ma auala eseese mo le pulega ma le vaavaaiga o Poloketi sa faia i Suva, Fiti mai le aso 2-6 Novema 2009.

O Unutoa Auelua-Fonoti na faatasi atu i le aoaoga tuufaatasi a le Iuni o Fesootaiga a le Lalolagi ma Ofisa o Pule Faatonu i Asia ma le Pasefika i mataupu tau fesootaiga ma faasalalauga sa faia i Melepone, Ausetalia mai le aso 30 Novema-4 Tesema 2009.

Sa mafai ona auai atu Elisa Kohlhase i le aoaoga tuufaatasi a le Iuni o Fesootaiga a le Lalolagi ma le Matagaluega o Fesootaiga a le Malo o Vietnam i le Faatulagaina o Tulafono ma Faatonuga tatau mo auaunaga tau fesootaiga, sa faia i Nha Trang, Vietnam mai le aso 8-9 Tesema 2009.

Na ia faatasi atu foi i le aoaoga mo atunuu tau atia'e o lo'o aofia i atunuu o le taupulega e tusa ai ma le mataituina ma alafua mo fesootaiga, faamatalaga ma fesootaiga vavave faaneionapo sa faia i Malta, mai le aso 7-12 Iuni 2010.

O Karen Komiti sa auai atu i le aoaoga a le Iuni o Fesootaiga a le Lalolagi ma le Iunivesite o Malaysia i mataupu tau faatuina o auaunaga faatekonolosi fou tau initeneti mo le mamalu o le atunuu o lo'o alala i nuu i tua, sa faia i Malaysia mai le aso 26-28 Aperila 2010.

Sa mafai foi ona maua le avanoa e auai atu ai Pule Lagolago e toa tolu i le Aoaoga mo le mataituina ma alafua o auaunaga i le Iunivesite o Florida i Amerika. O le polokalame sa faia i le aso 10-22 Ianuari 2010 sa auai ai le tamaita'i Loia, ae o le polokalame sa faia i le aso 7-18 Iuni 2010 sa auai uma ai le Pule Lagolago o le Vaega o Alaleo ma le Faainisinia ma le Pule Lagolago o le Vaega e Mataituina Auaunaga o Fesootaiga.

Sa mafai foi ona maua le avanoa e Ofisa Sinia e toalua a le Vaega o Alaleo ma le Faainisinia e faatasi atu ai i galuega faamasani mo le vaiaso atoa i le Matagaluega o Atinae i Niu Sila mai le aso 19-23 Aperila 2010. Sa la auai atu foi i lea lava ituaiga polokalame faamasani i le Pulega o Fesootaiga a le Malo o Ausetalia i Canberra, Ausetalia mai le aso 17-21 Me 2010.

O le a ave le faamuamua a le Ofisa i le faaleleia o ana fesootaiga ma le mamalu o le atunuu e ala atu i lana upegatafailagi ma nisi auala e siitia ai le faatinoina o ana faatalatalanoaga faalauaitele ma le mamalu o le atunuu. O le a ave foi le faamamafa i le faaaogaina lea o se polokalame televave faaneionapo mo faamaumauga i totonu o le ofisa aua le faaleleia o galuega fai.

Ua iai le manatu i le tagai i le lumanai ae faapea le atinaeina o le maketi o fesootaiga, o le a tuufaatasi ai e le Ofisa o le Pule Faatonu lana Fuafuaga Autasi i le amataga o le tausaga faaletupe 2011.

3 Vaega Tau Tulafono

Sa matauina le tele o mataupu sa fa'afeagai ma le Vaega Tau Tulafono i lenei tausaga e aofia ai ma mataupu nei –

- a. Tagi a le Digicel na faauluina atu i le Fa'amasinoga Mauualuga mo le toe iloiloina fa'a-fa'amasinoga o le taualumaga a le Komisi Fa'amasino;
- e. Tagi a le Digicel na tuuina atu i le Komisi Fa'amasino e fa'asaga lea i le toe fa'avasegaina e le Pule Fa'atonu o tau mo le fetaulaiga o feso'otaiga;
- i. Fa'amaninoina lea o noataga fa'aletulafono a Kamupani eseese o lo o tuuina atu auaunaga tau feso'otaiga;
- o. Galulue fa'atasi ma kamupani ta'tasi ina ia fa'afaigofie ai le fa'atonutonuina o ia kamupani; ma le
- u. Fa'ataunuuina o fesufia'iga (consultations) e patino lea i le fausiaina o laisene e ono tuuina atu i Kamupani o lo'o fia auina atu auaunaga tau fesootaiga; ma
- f. Tuuina atu lea o fautuaga mo suiga o le Tulafono tau Fesootaiga i le Ofisa o le Loia Sili

3.1 Lu'itau tau tulafono

Tagi a le Digicel Samoa Limited i le Faamasinoga Mauualuga ina ia toe iloilo le taualumaga a le Komisi Faamasino

I le tausaga 2009, sa fofogaina ai e le Komisi Fa'amasino le tagi a le SamoaTel e fa'asaga i poloaiga a le Pule Faatonu numera 2008/03 ma 2009/01; o ia poloaiga sa fa'ailoa ai tau fa'ae le tumau mo so'otaga tau feso'otaiga ma i le mae'a ai o lea mataupu sa faia ai se fa'aiuga a le Komisi Fa'amasino e toe lafo mai poloaiga o lo o taua i luga i le Ofisa o le Pule Fa'atonu ina ia toe iloilo ma fa'avasega tau le tumau mo so'otaga o feso'otaiga i le va o le SamoaTel ma le Digicel. O lenei fa'aiuga sa faia i le aso 29 o Me 2009.

E le'i lagolagoina e le Digicel lea fa'aiuga ma na fa'aulu atu loa e le Digicel le ulua'i tagi i le Fa'amasinoga Mauualuga ina ia toe iloiloina e le Fa'amasinoga le fa'aiuga a le Komisi Faamasino. O le tagi a le Digicel sa faia lea i le latou talitonuga e sese auala sa fa'apea ona fa'atino ai e le Komisi Fa'amasino lana suesuega o mataupu ma ua solitulafono le fa'aiuga ua faia e le Komisi. Na fa'amaonia e le Pule Faatonu i ia taualumaga lona le tete'e atu i le faaiuga a le Komisi ma o fa'amatalaga tusitusia a le Pule Faatonu na tuuina atu i le Faamasinoga sa fa'atatau lea i le malamalamaaga o le Pule Faatonu i le Tulafono ma talafa'asolopito o le maketi o feso'otaiga. I le aso 23 o Oketopa 2009, sa faia ai le faaiuga a Justice Slicer e fa'aleaogaina ai le tagi a le Digicel.

E tusa ai ma le faatonuga a le Komisi Faamasino sa faia i le aso 29 o Me 2009, na toe tuuina atu ai poloaiga a le Pule Faatonu numera 2009/02 ma le 2009/03 e faailoa atu ai tau fou le tumau mo sootaga tau fesootaiga i le va o le SamoaTel ma le Digicel faatasi ai ma le faamaninoina o aso e amata ona faaoga ai tau le tumau fou.

Tagi a le Digicel e faasaga i poloaiga a le Pule Faatonu numera 2009/02 ma le 2009/03

E tusa ai ma poloaiga fou e lua a le Pule Fa'atonu e faasaga lea i tau le tumau mo so'otaga tau feso'otaiga, na fa'aulu atu ai e le Digicel se tagi i le Komisi Fa'amasino i le aso 6 o Novema 2009.

Ae le i fofogaina e le Komisi Faamasino lena mataupu, na tuuina atu se talosaga a le Digicel i le Komisi i le aso 18 o Ianuari 2010 ina ia toe ta'atia ese le tagi sa faapea ona faaulu atu i le Komisi.

3.2 Laisene

O le faamoemoe o le Ofisa o le Pule Faatonu ina ia o gatasi ana galuega ma le sini autu ua faapea ona faatulagaina e le Malo o Samoa mo le Maketi o Fesootaiga. E tusa ai ma le tatalaina atoatoa o le maeketi i le aso 1 o Iulai 2009, o lo o faamamafaina e le Ofisa o le Pule Faatonu le siitia o le faaogaina o faamatalaga ma tekonolosi aupito lata mai ma le fou ina ia faamalie ai manaoga o tagata Samoa.

E tusa ai ma lea faamoemoe, sa faatinoina ai e le Ofisa o le Pule Faatonu ni feutunaiga mo le fausiaina o tuutuuga o laisene mo auaunaga tau fesootaiga. O nisi o laisene e aofia ai –

- a. Laisene mo paipa fesootaiga o loo i lalo o le sami. I le taimi nei ua na o le tasi le Kamupani ua uma ona laiseneina mo lena ituaiga auaunaga – ASH Cable
- e. Laisene mo auaunaga tau fesootaiga Faava-o-Malo. I le taimi nei, ua toafa Kamupani ua laiseneina mo lena ituaiga auaunaga;
- i. Laisene mo auaunaga tau fesootaiga o lo faaogaina ai laina telefoni (fixed services). O lea ua faia se tuutuuga a le Ofisa o le Pule Faatonu ma le SamoaTel e tusa ai ma lea laisene a maea lena feutunaiga, o le a toe maua lena laisene e le SamoaTel e aunoa ma le toe faaogaina mai o ni faamatalaga e faamaonia ai e mafai e le SamoaTel ona tuuina atu nei ituaiga auaunaga.

3.3 Fa'atonuga ma Poloaiaga

O poloaiaga sa faapea ona tuuina atu i lenei tausaga e aofia ai –

- | | | |
|--------------------------|---|--|
| Poloaiaga Numera 2009/02 | - | Poloaiaga e toe faavasegaina ai tau faee le tumau mo sootaga o fesootaiga i le va o le SamoaTel ma le Digicel |
| Poloaiaga Numera 2009/03 | - | Poloaiaga e toe faavasegaina ai tau faee le tumau mo sootaga o fesootaiga i le va o le SamoaTel ma le Digicel |
| Poloaiaga Numera 2009/04 | - | Poloaiaga e faamalosia ai SamoaTel ina ia fesootai sootaga tau fesootaiga a le SamoaTel ma le Digicel e patino tonu i le digifixed service a le Digicel. |

Toe Faavasegaina o tau le tumau mo sootaga tau fesootaiga e tusa ai ma le faaiuga a le Komisi Faamasino

E tusa ai ma le faaiuga a le Komisi Faamasino, na faataunuuina ai e le Ofisa o le Pule Faatonu se galuega mo le toe faavasegaina o tau faaee le tumau mo sootaga tau fesootaiga mo le piliota e amata mai ia Oketopa 2008 seia oo i le aso 30 o Iuni 2009. I le maea ai o talatalaga a le Ofisa o le Pule Faatonu ma le SamoaTel ma le Digicel, na ia tuu atu ai poloaiaga Numera 2009/02 ma le 2009/03 i le aso 7 o Oketopa 2009. Na teteaina e le Digicel nei poloaiaga ma faaoo atu ai lana tagi i le Komisi Faamasino. O lea tagi na toe taatia ese i le masina o Ianuari 2010 ona o se talosaga a le Digicel i le Komisi.

Suesuega e faia i tau o auunaga mo tau tumau mo sootaga mo fetaulaiga o fesootaiga

Ona o ni vaega o le lipoti a le SBR na fesiligia e Kamupani, sa toe fa'aauau ai e le Pule Fa'atonu lana suesuega e faia i tau o auunaga tau fesootaiga ma e le'i maea lea suesuega i lenei tausaga. Peita'i o lo o iai se fa'amoemoe o le Pule Fa'atonu o le a fa'amautū se lipoti e tusa ai ma ana suesuega i le kuata muamua o le tausaga faaletupe o loo sosoo mai. Ona o lenei mataupu ua fai sina umi o tau fa'ataunuu, o le naunautaiga o le Pule Fa'atonu o le fa'amautū lea o tau fa'aee mo sootaga o feso'otaiga ae le'i maea le 2010.

3.4 Iloiloga o le Tulafono o Fesootaiga

Fautuaga mo suiga o nisi o vaega o le Tulafono o Fesootaiga 2005

Ona o mataupu na matauina e le Pule Faatonu i tagi sa faapea ona faaulu atu e le Digicel i le Komisi Faamasino, ua afua ai se manatu o le Ofisa o le Pule Faatonu ua ao ona toe iloilo le Tulafono o Fesootaiga. O lea ua maea ona saunia ma tuuina atu i le

Ofisa o le Loia Sili se lipoti o lo o aofia ai se fautuaga mo le toe iloiloaina o le Tulafono faatasi ai ma se lisi o suiga ua manatu le Pule Faatonu ua talafeagai mo le faatinoina o ona tiute faa-le-tulafono. O nei suiga e aofia ai mataupu o lo o taua i lalo-

- a. O le faasa'osa'oina lea o le sipelaina o nisi o upu o lo o faaaogaina i vaega ta'itasi o le Tulafono;
- e. Iloiloaina o le “auaunaga tau fesootaiga” o lo o taua i le Tulafono;
- i. Faamaninoina o malosiaga o le Pule Faatonu i le vaega 8 o le Tulafono – suiga o le vaega 8(1)(u) o le tulafono;
- o. Fa'amautūina o le tuto'atasi o le Ofisa o le Pule Faatonu aemaise i le puleaina o tagata faigaluega a le Ofisa o le Pule Faatonu
- u. Vaega 11(1) – suiga o tulaga e tatau ona faatinoina mo se tagi e fia faauluina atu i le Komisi Faamasino;
- f. Tulaga tatau e faatinoina e se ua tagi mo le toe tuuina mai i tua o lana tagi;
- g. Faamaninoina o tulaga o tupe totogi mo se tagi;
- l. Faamaninoina o malosiaga o le Komisi Faamasino;
- m. Faamautūina o se taimi fa'agata mo le faauluina atu o tagi i le Faamasino Maua-luga;
- n. Faasalaga mo e ua solitulafono e tusa ai ma le faaaogaina sese o alaleo po o alaata; ma le
- p. Talosaga ina ia fausia ni Faatonutonuga e patino tonu mo taualumaga e faatinoina e le Komisi Faamasino.

O lo o faatali nei le Ofisa o le Pule Faatonu mo se tali mai le Ofisa o le Loia Sili e tusa ai ma le fautuaga sa faapea ona tuuina atu. O lo o malamalama lenei ofisa i le anoano o galuega o loo gafa nei ma le Ofisa o le Loia Sili ma o le a galulue faatasi le Ofisa o le Pule Faatonu ma le Ofisa o le Loia Sili ina ia faatulagaina nei suiga i se taimi vave o i luma.

4 Vaega o Alaleo ma le Faainisia

I totonu o lenei tausaga faa-le-tupe, ua maitauina ai e le Vaega o Alaleo ma Faainisia le faaauau lea ona faatuputupulaia ana galuega fai. O loo ave lava le faamuamua i le Faatonutonuina o Auaunaga o loo ua i ai i le taimi nei faapea le faamautiina o faamaumaga ma le lesitala o auaunaga o loo faaaogaina alaleo, o le iloiloga (auditing) o le faaaogaina o alaleo ma numera telefoni, ae maise ai le tapenaina o se Tulafono Faatonutonu e lima taitaina ai ma puipuia mai ai i le felavasaiga o alaleo. Ua faaititia laisene ua mafai ona tuuina atu i lenei tausaga faa-le-tupe faatusatusa atu i le tausaga faa-le-tupe ua tuanai. Sa toe iloiloina le vaevaega o le fusi o alaleo ma mafai ai loa ona tuuina atu ni alaleo mo le faatinoina o se faiga faavae mo Fuafuaga o Fesootaiga i le Taimi o Faalavelave Faafuasei. Sa taula'i lava le tapenaina o nei Alafua i se auala talafeagai ina ia maua ni alaleo manino mo fesootaiga i taimi o faalavelave faafuasei, ae maise ai lona faaaogaina o le fusi o alaleo i se tulaga maua ma faigofie i ala uma o fesootaiga.

O le mataituina o auaunaga ma alaleo ua avea o se galuega faifaiepea ma ua mafai ai ona iloa o loo faaaogaina alaleo e tusa ai ma aiaiga e tuuina atu i e o loo ofoina le auaunaga.

O loo ua faaaogaina nei se alafua ua maea ona tapenaina mo televise ma o loo mataituina ma le toto'a ina ia usitaia mo le puipuiga i ni faafitauli e tulai mai e ala i le felavasaiga o alaleo.

Ua maea nei le iloiloga o numera telefoni ma ua i ai le faamoemoe e faamaea lona faavasegaina i le tausaga faa-le-tupe o loo lumanai nei.

O loo faaauau pea le siakiina o masini mo fesootaiga mai i lea taimi i lea taimi; e fua i luga o alafua faa-va-o-malo ua maea ona faataotoina.

O le faanaunaga o le Vaega o Alaleo ma Inisia, o le faamautinoaina le mama ma le manino o le fusi o alaleo ma ia alofia le aafia i felavasaiga o alaleo.

4.1 Laisene mo le faaaogaina o Alaleo

O le Ofisa o le Pule Faatonu latou te tuuina atu laisene mo le faaaogaina o alaleo ma o loo aiaia i lalo o le Tulafono o Fesootaiga 2005. O le aofaiga o laisene na tuuina atu i le tausaga faa-le-tupe 2009/2010 e 43.

I le piliota e afua mai i le aso 1 Iulai 2009 i le 31 Iuni 2010, ua maitauina ai e le Pule Faatonu le faaauau lea ona tuuina atu laisene i lalo o aiaiga ma alafua ua maea ona fausia ma faataoto ma le faamoemoe e usitaia e i latou o loo faaaogaina alaleo.

O lo'o faailoa atu i le ata 4.1 le aofaiga o laisene na tuuina atu i le piliota 2009/2010.

Ituaiga Laisene	Piliota		Aofaiga o Laisene
	Iulai 09 – Tesea 09	Ianuari 10 – Iuni 10	
Amateur Radio	10	4	14
Broadcasting FM	0	3	3
Fixed Link & GSM	0	4	4
Land Mobile & Base	4	1	5
Ship Radio License	2	5	7
Satellite Earth Station	2	2	4
Broadcasting TV	1	1	2
Aircraft Radio License	3	1	4
Total	22	21	43

Ata 4.1: Aofaiga o Laisene na tuuina atu mo le galueaina afua mai i le aso muamua o Iulai 2009

4.2 Puleaina o le Fusi o Alaleo

O le fusi o alaleo o se atinae e ao i soo se Malo ona pulea lelei ona o se atinae e ititi ae faatuputupulaia manaoga o i latou e fia faaaogaina i auaunaga eseese e pei o leitio ma televise, uaealesi i luga o le fogaeleele, satellite, fesootaiga i le taimi o faalavelave faafuasei, vaai tau, fesootaiga mo le saogalemu i luga o le eleeele, sami, ea ma isi ala o fesootaiga.

O le manaomia o alaleo mo nei auaunaga ua maofa le televave i lenei vaitau pe a faatusatusa atu i tausaga ua tuanai, ma o loo agai pea i luga. O se faataitaiga lelei o lenei televave o le faaaogaina o le uaealesi e pei ona i ai telefoni feaveai ua le gata i Samoa nei ae faapea atunuu i fafo. Ua faapea foi le televave o le manaomia i leitiio ma televise ina ia siitia ai la latou auaunaga i se tulaga maua luga e mafai ai ona faasopolia Samoa atoa.

Ua tapenaina e le Vaega o Alaleo ma Inisinia ni Faiga Faavae ma Alafua mo Fusi o Alaleo mo le faamautinoaina o le faatinoga aupito sili ona lelei ma taunuuga lelei o le faaaogaina o le fusi o alaleo mo fesootaiga ina ia aua nei aafia i ni felavasaiga o alaleo.

O le sini autu o nei faiga faavae; ina ia mautinoa le faaaogaina o nei alaleo i se tulaga aloaia ma talafeagai ma ia maua pea avanoa mo le vaeveaga i tekonolosi ma auaunaga fou.

O loo faagasolo pea faatalatalanoaga ma i latou o loo ofoina auaunaga e faaoga ai le fusi o alaleo ina ia mautu ma malosi mo le agai i luma o fesootaiga. O le manatu maua luga ia mafai ona faamaeaina nei Faiga Faavae i le tausaga faa-le-tupe o lumanai nei.

4.2.1 Vaeveaga o Alaleo

O loo faaaauu pea iloiloga a le Vaega o Inisina talu mai le tausaga faa-le-tupe ua tuanai i alaleo ma lona faaaogaina e i latou o loo tuuina atu le auaunaga i Samoa. O le iloiloga mulimuli sa faataunuuina ia Me/Iuni o le tausaga faa-le-tupe ma sa avea o se vaega o Faiga Faavae mo le Fusi o Alaleo, ma o loo i ai le faamoemoe e faamaeaina i le tausaga faa-le-tupe o lumanai nei. O le vaeveaga o alaleo o loo fua i luga o lona faaaogaina o loo i ai i le taimi nei ma le vaaiga mamao i le lumanai.

I le tausaga 2009/2010 sa taulai le fuafuaga ma le vaeveaga o alaleo i se auala e mafai ai ona o gatusa vaeveaga i auaunaga o loo ua i ai i le taimi nei ma le vaeveaga i tekonolosi faaneionapo e pei o le 3G ma le 4G, o loo i ai le faamoemoe o le Ofisa o le Pule Faatonu ia oo atu i le tausaga faa-le-tupe o lumanai nei ua mafai ona tuuina atu se laisene se tasi mo nei auaunaga fou. O loo i ai foi le faamoemoe mo le faamatu'uina atu o se vaega o le fusi o alaleo mo le fesuiaiga i le tekonolosi o televise faaneionapo.

Sa i ai suiga i le vaevaega o le fusi o alaleo e auiliili ai vaega o fesootaiga e patino i ai nei vaevaega ina ia faamautu ai ma faamausali se alafua mo fesootaiga i Samoa.

O nei suiga o loo faataoto mai i se alafua a le Iuni o Fesootaiga a le Lalolagi ma o loo aiaia foi i lalo o le Tulafono o Fesootaiga 2005.

4.2.2 Mataituina o Alaleo

O loo faaaauau pea ona faaaogaina le taavale o loo faatotogaina i masini mo le mataituina o alaleo i taimi faatulagaina ma taimi e manaomia ai ina ia faamautinoaina o loo faaaoga le fusi o alaleo e i latou o loo ofoina atu le auaunaga i fesootaiga i se tulaga aupito sili ona lelei ma ia aua nei aafia i felavasaiga o alaleo.

Ona o le faatuputupulaia o le manaoga i alaleo ua taulai ai le Ofisa o le Pule Faatonu e faaleleia atili le puleaina o le fusi o alaleo ma siitia le auaunaga i se tulaga maualuga ina ia aua nei i ai se faaletonu e tulai mai i se taimi o i luma.

O loo i ai pea le Vaega a le au inisinia i se tulaga lelei ma talafeagai e faaaauau ai pea le mataituina o le fusi o alaleo ua le gata i Upolu ae faapea foi Savaii.

4.2.3 Faiga Faavae mo le Faasoasoina ma le Faaaogaina o Alaata i Televisi

Ua maea ona saunia e le Ofisa o le Pule Faatonu se pepa ua faaigoaina o le “Faiga Faavae: Faasoasoina ma le Faaaogaina o Alaata mo Televisi i Samoa”, ma o lenei pepa na faailoa i le tausaga faaletupe ua tuanai atu. O lenei pepa na saunia ina ia mafai ai ona toe faaleleia le faasoasoina o alaata mo le faaaogaina i televisi. O le mafuaaga o lenei faamoemoe talu ai ona o le tele o le manaomia o alaata i le vaega ua taua o VHF (alaata i le vaega i lalo o le fusi o alaleo). O i latou o lo o talosaga mai mo le faaaogaina o nei vaega o le fusi o alaleo e mafuli atu ia i latou o lo o faaaogaina alaata e tuuina atu lenei auaunaga e aunoa mase totogi i le mamalu o le atunuu (free-to-air television). Talu ai ona o nei Fale Televisi e tuuina atu fua le latou auaunaga i le mamalu o le atunuu, o lea e taua ai i le Ofisa o le Pule Faatonu le talosaga ua tuuina mai mo lea faamoemoe. E i ai le naunautaiga o le a avea lea itu ma ala o le a oo atu ai le auaunaga tau televisi i nuu ma alalafaga i tua aemaise vaega uma o le atunuu o lo o faatonuina mai e le Tulafono ina ia faaoo atu ai lenei auaunaga tau televisi. E aoga tele foi lenei faatatau ina ia tuu ititia ai le faaaogaina tele o alaata e ono tupu mai ai ni felavasaiga o alaleo ma afaina ai le manino o alaleo o lo o faaaoga i le taimi nei.

O lo o iai se fuafuaga a le Ofisa o le Pule Faatonu e toe iloiloaina ai ma faatulagaina alaata ua faaavanoa talu ai suiga fou i tekonoosi ua faaogaina e Kamupani Televisi e faatino ai auaunaga tau faasalalaga.

4.2.4 Faiga Faavae Puleaina o Fusi o Alaleo

Na tapenaina e le Vaega o Pulega o Alaleo ma Inisinia se Faiga Faavae o Fusi o Alaleo. O le auga ma le faamoemoega o leni Taiala, ina ia lelei le faasoasoina o alaleo mo i latou o loo moomia i suiga fou i tekonoosi mo auaunaga fesootaiga i Samoa. I leni fuafuaga o loo fesoasoani i tulaga faatauvaga i fesootaiga faapea le ola maloloina ma le saogalemu o tagata lautele. O le Ofisa o le Pule Faatonu na faatautaia nisi o faatalatalanoaga e le gata i le Fuafuaga mo Fesootaiga i Taimi o Faalavelave Faafuasei; ae faapea foi Fuafuaga i le Puleaina o Fusi o Alaleo i leni tausaga faaletupe. Ua atoa ai nei le sefulu fa (14) o Faiga Faavae poo fuafuaga o Fusi Alaleo ua faia e le Ofisa o le Pule Faatonu ma le faamomoe e toe iloiloaina i le ta'i tolu tausaga. Ua fuafuaina se faatalatalanoaga ia Fepuari 2011 e faamaea ai, a o lei tuuina atu mo le pasiaina ma faaogaina ia Mati 2011.

4.3 Faanumeraina o Telefoni

I totonu o le tausaga faaletupe e 2009/2010, na faasoasoina ai numera telefoni ma numera pupuu i Kamupani Telefoni o loo faaogaina leni auaunaga i luga o le faatagana a le Ofisa o le Pule Faatonu. Talu mai ona tuuina atu le saolotoga i Kamupani Telefoni o lo o faaogaina fesootaiga i Samoa, ua maituina ai le maoae o le toatele o i latou ua faaogaina nei auaunaga aemaise lava i fesootaiga i telefoni feaveai.

O le matafaioi a le Ofisa o le Pule Faatonu le faasoasoina, o le faanumeraina o telefoni ma mataitu le faaogaina e i latou o loo ofoina atu lea auaunaga. I le Tulafono o Fesootaiga 2005, ua faamautuina mai ai e le Tulafono le malosiaga i le Ofisa o le Pule Faatonu e faasoasoina ma puleaina ai le vaaiga o fuainumera ina ia talafeagai ma aiaiga o le Tulafono. O le Kamupani a le SamoaTel ma le Kamupani a le Digicel ua tuuina atu i ai le faatanaga e faaogaina ai ia numera. I leni tausaga faaletupe, na faatautaia ai e le Ofisa o le Pule Faatonu suesuega ma faamaumauga o Numera o telefoni o loo faaogaina i Samoa nei. O faamaumauga ma faamatalaga mai i leni suesuega o le a faaoga e fesoasoani ai i le Ofisa i le tuufaatasia lea o se Fua Faataau mo le faaogaina o Numera Telefoni i totonu o Samoa, ma o le a auina atu foi mo le

faalauiloaina i le Upegatafailagi a le Iuni o Fesootaiga a le Lalolagi. O le a faamaeaina le Fuafuaga o Numera i telefoni i le tausaga faaletupe o loo lumanai nei.

4.4 Fuafuaga o Fesootaiga i Taimi o Faalavelave Faafuasei (NETP)

I le tulai mai o le faalavelave faa-le-natura e pei o le Galulolo na aafia ai Samoa ia Setema 29, 2009 ae maise i le itu i Saute i Sasae o Upolu; na mafai e le Matagaluega o Punaoa Faalenatura ma Siosiomaga ona iloa ma maitauina le mafuie ma se galulolo o le a tulai mai ae o le faaletonu ogaoga o le fesootaiga atu mo le faailoaina ma faailoilo mo le silafia e tagata lautele. O le lape lea ua maitauina ma iloa o le utiuti o ala o fesootaiga e tuuina atu ai lapataiga i tagata lautele i taimi o faalavelave faa-le-natura.

Ua maitauina le moomia o se Alafua mo Faalavelave Faafuasei, faapea ai ma le fausia o ni Taiala ina ia faaleleia atili fesootaiga e fesoasoani atu ai i taimi o faalavelave, o lea na galulue ai le Ofisa o le Pule Faatonu e taulamua i le fausiaina o se Alafua o Fesootaiga i Taimi o Faalavelave Faafuasei faatasi ai ma le lagolago mai a Matagaluega a le Malo, Kamupani Telefoni ma Faalapotopotoga Tumaoti. Ua maea ona faia faatalatalanoaga ma Matagaluega ma Faalapotopotoga e fitoitonu i ai lenei Taiala. O lenei Fuafuaga na fausia i se vaaiga taulai mo le agai i luma o le faaaogaina o fesootaiga televavave mo faalavelave faafuasei ina ia mafai ona tuuina sao atu faamatalaga ia i latou o loo fitoitonu i ai galuega faapea ma o latou tiute tauave. Ua maea nei ona tapenaina lenei Fuafuaga ma o le a tuuina atu i le Kapeneta i le kuata muamua o le tausaga faaletupe o loo luma nei e faamaonia mo lona faaaogaina.

4.5 Masini e Faaaogaina i Fesootaiga

O loo faaauauina pea e le Vaega o Alaleo ma Inisinia le mataituina o masini o lo o aumaia i totonu o le atunuu i le faamoemoe e faaaogaina i fesootaiga. I le Tulafono o Fesootaiga 2005, o loo tuuina mai ai le malosiaga i le Ofisa o le Pule Faatonu ina ia puleaina ma faatonutonuina lea tulaga. O le mataituina o nei masini e aafia ai le mautinoa lelei e leai ni faaletonu e tulai mai a o faaaogaina lea masini i soo se auala o fesootaiga i totonu o Samoa. I le taimi nei o lo o faaaogaina e le Ofisa o le Pule Faatonu ni Taiala (Standards) o lo o faaaogaina e atunuu i fafo e aafia ai Amerika, Europa, Ausetalia ma Niu Sila e faataunuuina ai le faatonutonuina o masini i totonu o Samoa. O taiala mai nei atunuu o lo o faaaogaina i le tele o atunuu o le lalolagi ma ua faamaonia mai foi le talia o lea auala e le Iuni o Fesootaiga a le lalolagi le ITU.

Amata mai i le aso muamua o Iulai le tausaga e 2009 e oo mai i le aso 31 o Iuni 2010, e 12 le aofaiga o masini na maea ona suesueina lona agavaa e faaogaina ai i Samoa ma ua faamaonia foi le lelei ma le agavaa e faaogaina i le maketi i Samoa nei. O loo lisi atu i le siata i lalo ia masini ma auala o fesootaiga o lo o faaogaina ai aemaise o aso na faatulafonoina ai le faaogaina o nei masini mo fesootaiga.

Kamupani o lo o Fausiaina Masini	Faamatalaga e uiga i le masini	O le numera e faailo ai le masini	Aso na faamaonia ai le faaogaina
Nokia Corporation	Nokia CS-15 Modem	RD-10	24-Aukuso-09
	Nokia 2680s-2 Mobile	RM-392	4-Aukuso-09
Blackberry	Wireless Smartphone	9700	27-Oketopa-09
Ralink Technology	Ralink 3090	RT3090BC4	1-lanuari-10
Nokia Australia PTY	Nokia GSM Mobile	N1280	22-lanuari-10
	Nokia 2220s	RM-590	30-Mati-10
	Nokia 2690	RM-635	30-Mati-10
Panasonic Corporation	Personal Computer	Class B CF-52	15-Aperila-10
Nokia Australia PTY	Nokia 1616-2	RH-125	28-Aperila-10
Research In Motion	Blackberry Smart Phone	BB9100	27-Me-10
Nokia Corporation	Nokia X2-00	RM-618	4-Iuni-10
	Nokia N8-00	RM-596	4-Iuni-10

Ata 4.2: Aofaiga o Masini mo fesootaiga ua faatulafonoina lona faaogaina i Samoa mai le aso muamua o Iulai 2009 i le aso 31 Iuni 2010

4.6 Felavasaiga o Alaleo ma Alaata

I le tausaga faaletupe e 2009/2010, e na o le tasi le faaseā na oo mai i le Ofisa o le Pule Faatonu e mafua mai i felavasaiga o alaleo. O lea faasea na faaooina mai e le Ofisa o Pulega o le Malae Vaalele (Airport Authority). E tusa ai o se faamatalaga na tuuina mai e le Ofisa o le Pulega o le Malae Vaalele, ua le mafai ona fesootai atu lo latou Ofisa i le elelee i vaalele o loo femalagai i le ea i le alaleo 118.1MHz ma ua avea lea ma pona o le galuega mo i latou aemaise ai o le soifua o le mamalu o le atunuu o lo o femalagai i luga o vaalele savili.

O lea na faanatinati atu ai le Vaega o Inisinia a le Ofisa o le Pule Faatonu mo le asiasia o lea vaega aemaise le vaega o lo o i ai pou faasalalau a le Ofisa o le Pulega o Vaalele i le Mauga i Fiamoe. Na faia suesuega i masini ma le taavale faapitoa mo le suesueina o ia tulaga i auala e pei ona masani ai, ma o le iuga lenei o le suesuega sa faia ina ua uma ona mataituina lenei faalavelave e masini aemaise o suesuega a le Vaega o Inisinia.

- 1) Ina ua faia le suesuega na maua ai o lo o i ai ni nai vaega laiti o alaleo o lo o i totonu o le vaega o le alaleo 118.1MHz o lo o faaaogaina e le Ofisa o Pulega o le Malae Vaalele. I le talitonuga o inisinia a le Ofisa o le Pule Faatonu, o nei vaega laiti e le tatau ona tupu ai se felavasaiga tele e pei ona taua e le Ofisa o le Pulega o Malae Vaalele. O nei vaega laiti e mafua mai i le alaleo nuti o lo o mafua mai le elelee poo alaleo o lo o liki mai i alaleo o lo o faaaogaina e faasalalau tau televise ma leitio, ma e ui ina laiti, ae e tatau ona aveesea. O lea na logoina ai loa i latou o lo o faaaogaina ia alaleo ina ia famamaina lea vaega i se taimi vave.
- 2) I le faataunuaina o ona tiute mo le faaleleia o felavasaiga o alaleo e pei ona faatonuina mai e le Tulafono, o lea na faatonuina ai i latou e pulea auaunaga leitio ma televise o lo o iai a latou pou faasalalau i le Mauga i Fiamoe, ina ia oo mai e tapē auauai a latou leitio ma televise ina ia mafai ai ona iloa lelei ma mautinoa lelei le alaleo o lo o mafua ai felavasaiga nei o alaleo e pei ona punitia ai fesootaiga a le malae vaalele ma vaalele savili. I le maea ai o lenei galuega ma māua ai e le o iai se alaleo leitio ma televise o lo o mafua ai le felavasaiga.
- 3) O lea na a'e ai se manatu i le Vaega o Inisia a le Ofisa o le Pule Faatonu o le a siaki masini faasalalau, aua o lea ua manino mai e le o se alaleo o lo o mafua

ai le felavasaiga ae o seisi auala e le i mailoa i lea taimi. I le faataunuuina o le siakiina o masini faasalalau na mauaina ai o se faaletonu i se masini faamama alaleo (filter) a le Ofisa o le Pulega a le Malae Vaalele na mafua ai le faaletonu. Na toe suia le masini faamama alaleo ma toe faaleleia ai loa fesootaiga i le laueleele ma le ea. Na faia fesootaiga e siaki ai pe ua mama fesootaiga ina ua uma ona faaleleia le masini sa faaletonu.

E manino mai i le galuega atoa na faataunuuina le maimau o le taimi ma tupe na alu i le tau faaleleia o felavasaiga lea na manino mai e le o se felavasaiga ae o le faaletonu lava i masini a le Ofisa o le Pulega o le Malae Vaalele. Talu ai ona o le taua o le fesootaiga o lo o mafua ai le faaletonu aemaise le soifua ma le ola o le mamalu o le atunuu o lo o femalagai i le ea, o lea na lagona ai le faanoanoa o le Ofisa o le Pule Faatonu ona o le le faatauaina e le Pulega o le Malae Vaalele o le siaki lelei o a latou masini mo fesootaiga. O lea e fautuaina ai e le Ofisa o le Pule Faatonu le mamalu o Kamupani ma Ofisa o lo o faaogaina alaleo mo fesootaiga ina ia tagatagai totoa i lea tulaga.

Talu mai lenei faaletonu, na faia ai loa e le Ofisa o le Pule Faatonu se Pepa o Faamatalaga e faatumuina e se sui e ono mauaina ni felavasaiga o alaleo i a latou fesootaiga ina ia faatumu lelei lenei pepa faatumu ma faaoo mai i le Ofisa ina ia faafaigofie ai ona sutesueina mataupu e uiga e felavasaiga aemaise i felavasaiga e mafua mai i isi auala ae le o alaleo ma alaata.

O lo o i ai le faamoemoe o le Ofisa o le Pule Faatonu i le tausaga faaletupe e 2010/2011 o le a faalauiloa ai e le Ofisa o le Pule Faatonu se Alafua mo le faaogaina ma le vaaia o pou faasalalau ma fale e tuuina ai masini ina ia faaititia ai le soona faia o pou ma fale e le manaomia ona o nisi foi ia vaega o lo o mafua ai nisi o felavasaiga o alaleo, aemaise lava mo le pou faasalalau i Mauga Fiamoe ua mātāuina lava le faaletonu o le tele anoanoai o pou ma fale ua faia ae le faaoga pou ma fale ua maea ona i ai.

5 Vaega e Mataituina Auaunaga

I totonu o lenei tausaga faaletupe, ua filifilia ai se tamaitai na te tauaveina le tofi o le Faauluuluga o le Vaega e Mataituina Auaunaga o Fesootaiga ma sa afua mai i le masina o Aukuso 2009 ona tiute tauave i totonu o le Ofisa. O tiute ma matafaioi a lea Vaega i lenei tausaga faaletupe o le faamautuina ma tapenaina lea o auala e uia faapea ma Taiala e foia ai faitioga a tagata o lo o faaaogaina auaunaga, e agai i Kamupani o lo o tuuina atu le auaunaga tau fesootaiga. O se tasi foi o galuega o le tapenaina o le Faiga Faavae mo Avanoa Lautele mo fesootaiga.

5.1 Mataupu Totoe

I le gasologa o lenei tausaga faaletupe, na suesueina ai le tele o mataupu tuua a lenei Vaega, o le tasi o mataupu ua leva a o le i iai lenei Vaega a o nisi mataupu e agai sao i Vaega o Tulafono a o le i oo i le Pule Faatonu ma o lo o manaomia pea ni metotia e faalautele ai ni faatalatalanoaga mo faaiuga talafeagai e agatonu ai. O le tele o mataupu e fitoitonu mo le Vaega e Mataituina Auaunaga ma le Vaega o Tulafono e afua mai i feeseeseaiga o Kamupani o lo o tuuina atu auaunaga tau fesootaiga ma sa faatalatalanoa i le faaiuga o lenei tausaga faaletupe. O nei mataupu ua i le laasaga mulimuli, o le tuuina mai lea o talosaga a Kamupani o lo o tuuina atu auaunaga e faatatau i nei mataupu. Ua iai le naunautaiga o nei feutagaina ma nei talosaga o le a faamaeaina pe a fai iai le faaiuga a le Pule Faatonu ma tuuina atu ai loa e le Pule Faatonu ni Poloaga e lima taitaiina ai ma faalauaitete ai i le isi tausaga faaletupe.

5.2 Fetaulaiga o Laina tau Fesootaiga

O le atofaina o tau o fetaulaiga o laina tau fesootaiga o se tasi nei o mataupu taua tele sa taumafai iai le Pule Faatonu e faamautu se tau faavae mo fetaulaiga o laina tau fesootaiga ma amata ai i le Aso 1 Iulai 2009. O le faatautaiga o nei tau faavae sa fesoasoani mai ai se tasi o Kamupani ua iai le tomai faapitoa ua faaigoaina o le SBR Juconomy Consulting (Germany).

I le maea ai ona faatino suesuega e faamautinoa ai ni tau, sa tuuina ai loa le avanoa i Kamupani Telefoni o le Digicel ma le SamoaTel ina ia tuuina mai ni talosaga e faatatau i auala mo le faatulagaina o tau aemaise o tau ua faataoto nei. O lenei gaioiga na maea i le gasologa o lenei tausaga faaletupe ma sa tuuina atu ai ni pepa mo faamatalaga (Considerations Paper) i le Aso 29 Mati 2010 i nei Kamupani mo ni manatu e fia faamauina ae le i faia le faaiuga mulimuli a le Pule Faatonu i lenei mataupu.

Ua iai le faamoemoe, o lenei faaiuga o le a faamatala auiliili atu i totonu o le Poloaga mai le Pule Faatonu mo le atofaina o tau o fetaulaiga o laina mo telefoni fale ma

telefoni feaveai mo le umi e lua (2) tausaga ma tuuina atu ai faalauaitele i le isi tausaga faaletupe.

5.3 Tau ma le Faatulagaina o Totogi o Telefoni

O le mautu ai o tau o fetaulaiga o laina tau fesootaiga ua mautinoa ai e le Ofisa o le Pule Faatonu se amataga taua tele foi lea mo le suesueina o tau o loo tuuina atu e pisinisi laiti o lo o tuuina atu le auaunaga tau fesootaiga i tagata o loo faaaogaina auaunaga. O lo o atagia mai i nei feutagaina o le a amata ai foi ona faagasolo ni suesuega a le Ofisa a le Pule Faatonu ina ia mautinoa e le o totogi e tagata o loo faaaogaina auaunaga se tau i lalo ifo o le tau e pei ona faatulagaina ma faaailoa e le Ofisa o le Pule Faatonu. E le gata i lena, ae o le isi vaega taua o lenei suesuega o le mautinoa lea e le Ofisa o le Pule Faatonu o tau ma le faatulagaina o totogi o telefoni e tatau ona faamaonia e le Ofisa o le Pule Faatonu tusa ai ma aiaiga o le Tulafono, ma a le uia lea tulaga e tatau i Kamupani ona tuuina mai faasologa o tau ina ia tuuina atu iai le faamaoniga e pei ona iai muamua.

O loo iai le faamoemoe e faamaeaina nei suesuega i le isi tausaga faaletupe.

5.4 Avanoa Lautele

5.4.1 Faiga Faavae mo Avanoa Lautele

O le vaega muamua o le Faiga Faavae mo Avanoa Lautele na maea ona tapena ia Tesema 2009 ma tufaina atu loa i Faalapotopotoga Tumaoti, Faalapotopotoga a le Malo, Kamupani o loo tuuina atu auaunaga tau fesootaiga, o faalapotopotoga ma Komiti i nisi o nuu ma alalafaga. Sa faagasolo ai faatalatalanoaga ma tuuina mai loa nisi o manatu ma ua maea ona tuu i totonu o le Faiga Faavae ia Mati 2010.

O lo o i ai le faamoemoe o le a tuuina atu lea Faiga Faavae i le Ofisa o le Minista i le isi tausaga faaletupe mo sana iloiloga aemaise o le Kapeneta mo se faamaoniga.

5.4.2 Faaputugatupe mo Avanoa Lautele

O le polokalame mo Avanoa Lautele o lo o aofia i lalo o le Poloketi o Fesootaiga ma Falemeli lona faatupeina ma e faatupeina e le Faletupe o le Lalolagi. Ae peitai, e le i mafai ona agavaa le Ofisa o le Pule Faatonu i nei faaputugatupe ona o le taimi faatulagaina o le tapunia lea ia Oketopa 2010, e foliga o lenei faaputugatupe e le o mafai ona i ai i le taimi nei mo le faatinoina o nei poloketi.

O lo o iai le faamoemoe o le Ofisa o le Pule Faatonu o le a faaauau pea ona suesue nisi faaputugatupe mo Avanoa Lautele.

5.5 Faitioga a Tagata o lo o Faaaogaina Auaunaga

I totonu o lenei tausaga faaletupe, o lo o iai ni faitioga mai tagata o lo o faaaogaina le auaunaga, na tuuina mai i le kuata mulimuli o le tausaga faaletupe na mavae atu nei

ma o lo o moomia pea le soalaupuleina mo se fofo, ma o le fuafuaga a le Ofisa o le faia lea o ni faaiuga e mafai ona foia ai nei faitioga. O se tasi o faitioga e agai i tau o le faaaogaina o initaneti ma e le i foia lava ona e le i tuuina mai ni tali a nei Vaega e tusa ai ma le talosaga a le Ofisa o le Pule Faatonu ina ia faaoo mai ni faamaumauga o nei faitioga. I totonu foi o lenei tausaga faaletupe, sa faaoo mai ai i le Ofisa ni faitioga se lima (5) mai tagata o lo o faaaogaina auaunaga e uiga i ni mataupu e aofia ai le faatulagaina o pili mo le faaaogaina o le initaneti ma valaau i atunuu i fafo mai Kamupani o lo o tuuina atu le auaunaga, feeseeseaiga i le va o Ofisa o le Malo i le faamutaina o laina lisi (LDC), faitioga mai i aafiaga o le malosiaga o pou faasalalau. Ua maea ona fai i ai suesuega ma sa tuu i ai le avanoa e tuuina mai ai ni a latou tali maumaututu ma ua maea nei ona foia ia feeseesaiga ma faitioga i totonu o le tausaga faaletupe lenei.

O le tasi o faitioga e afua mai i le faaletonu o auaunaga a le Televisi (SQB) i Lona ma Fagaloa ma nisi vaega o Savaii ma ua maea ona fai i ai suesuega a le Vaega o Inisinia ma sa faatonuina ai le Faalapopototoga ina ia faaleleia ana auaunaga ia Fepuari ma na faaauauina ia Aperila 2010. I le faaiuga o le tausaga faaletupe sa maitauina pea le faaletonu o nei auaunaga i vaega lava ia o Upolu ma Savaii. O le isi o faitioga sa faamauiina i le tausaga faaletupe talu ai e faataata i faitioga i tau o le faaaogaina o initaneti e totogi atu i Kamupani tetele o lo o tuuina atu auaunaga tau initaneti (Wholesale ISP). O le faitioga e afua mai i maketi mo Kamupani tetele (wholesale ISP) o lo o tuuina atu le auaunaga tau initaneti ona o le leai o se faataua e tulimataia ai lea faafitauli, ma na foia e le Ofisa o le Pule Faatonu ma tapunia ai loa lea mataupu.

5.6 Faiga Faavae mo Faiga Faatauvaga mo Fesootaiga

O lo o galulue le Ofisa o le Pule Faatonu e atinae ma fausia se Faiga Faavae mo Faiga Faatauvaga mo fesootaiga ma sa soalaupuleina ma nisi o Matagaluega e pei o le Matagaluega o Fesootaiga, Faamatalaga ma Fesootaiga Vavave Faaonaponei ma le Matagaluega o Pisinisi, Alamanuia ma Leipa mo se auivi o le Faiga Faavae aemaise o tiute ma matafaioi maumaututu o le Ofisa o le Pule Faatonu e fesootai ai ma Kamupani o lo o tuuina atu auaunaga tau fesootaiga i totonu o le Faiga Faavae. O lo o i ai le faamoemoe o le Faauluuluga o le Vaega e Mataituina Auaunaga e auai atu i se tasi o aoaoga i le fausiaina o Faiga Faavae mo Faiga Faatauvaga i le isi tausaga faaletupe, ma o lo o i ai foi le naunautaiga o le a amata tapena ai se Faiga Faavae pe a toe taliu mai. O lea Faiga Faavae o lo o faamoemoe e faamaeaina i le isi tausaga faaletupe a sau nei.

6 Iloiloga o Vaegatupe

Na faamaonia i le Tala Faatatau o Tupe Maua ma Tupe Totogi se vaegatupe e \$1,370,000 mo le Ofisa mo le tausaga faaletupe Iulai 2009 ia Iuni 2010. O le aofaiga o tupe maua a le Ofisa na faamauina ia Iuni 2010 e \$3,566,464 ae o tupe faaaoga e \$3,566,464. Na faamauina ai lea o se aofaiga o tupe pa'u e (\$967,267).

O se aofaiga tupe e tusa ma le \$2,026,096 na maua mai e le Ofisa mo laisene ua mae'a ona toe tuuina atu i le Malo.

6.1 Alagatupe

O le aotelega o tupe maua a le Ofisa o loo maua mai pea i laisene tau fesootaiga ma laisene tau alaleo. O le 44.87% o tupe maua na maua mai i laisene mo auaunaga tau feso'otaiga ae 1.86% na maua mai i laisene tau alaleo. O ia vaegatupe e ese mai tupe maua mai le Malo e tusa ma le 52.71% o tupe maua a le Ofisa. O totogi mo le talosagaina o laisene eseese na maua mai ai leisi paleni o tupe maua.

6.1.1 Tupe Maua mai Laisene mo auaunaga tau Feso'otaiga

E \$1,166,204 le aofaiga o tupe maua na mafai ona piliina mo laisene mo auaunaga tau fesootaiga i le tausaga faaletupe faaiuina ia Iuni 2010. O lenei tino i tupe o loo aofia ai laisene a Kamupani o lo'o faatinoina auaunaga tau feso'otaiga e tusa ai ma le Tulafono Faatonutonu o Totogi o Laisene o Auaunaga tau Fesootaiga 2007.

I le maea ai o le tausaga faaletupe, na i ai le paleni mo pili e le'i totogiina mai e \$1,865,857. Ae peitai, o le 100% o ia pili na faia ma tuuina atu i Kamupani i le latalata ai i le faai'uga o Iuni 2010 ma o le a galulue le Ofisa ina ia mafai ona totogiina mai ia tupe i se vaitaimi talafeagai. Ae o le 30.11% foi o le vaega tupe ua taua i luga o lo'o faamauina o tupe maua mo le tausaga fa'aletupe o muamua.

6.1.2 Tupe maua mai Laisene tau Alaleo

O le aofaiga o tupe maua na mafai ona piliina mo laisene tau alaleo mo lenei tausaga e \$48,454. O lenei tino i tupe o lo'o aofia ai laisene mo e o lo'o faaaogaina alaleo e tusa ai ma le Tulafono Faatonutonu mo Totogi o Laisene o Auaunaga tau Alaleo 2007.

I le mae'a ai o le tausaga faaletupe, na i ai le paleni e le'i totogiina mai mo laisene tau alaleo e \$119,865 ma ua faaagaga le \$81,095 mo laisene ua umi se taimi e le o mafai ona totogiina mai ma ua tatau ona aveesea mai faamaumauga a le Ofisa.

E le gata i mataupu i laisene mo le faaaogaina o ualesi i luga o le laueleele e le i totogiina mai, ua fuafuaina foi le faia o se faatatau i le lē faaooina mai o le totogi mo isi ituaiga laisene tau alaleo ma totogi mo le talosagaina o laisene. Ua tatau nei ona

iloiloina ia tino i tupe ua le mafai on totogiina mai ma ua fautuaina ai e le Ofisa itu nei:

- i) Faaaopoopoina le piliota mo le totogiina mai o laisene ia i latou e le i totogiina mai laisene;
- ii) Faailoaina o nei tupe e le mafai ona toe totogiina mai ma aveesea mai tusi a le Ofisa o le Pule Faatonu;
- iii) Faaleaogaina uma laisene e le i totogiina mai;
- iv) Toe faamatuuina atu laisene fou pe a totogi mai tau o laisene ma alaleo.


6.2 Tupe Faaalu

I le tausaga faaletupe 2009/2010, o le aotelega o tupe faaalu a le Ofisa na faaaogaina mo le totogiina o le faagaoioiga o le Ofisa.

O le 56% o tupe faaoga a le Ofisa na faaalu i le totogiina lea o tupe maua mai laisene ma tuuina atu i le Malo.

E pei ona faaalua atu i le Ata 6.1, e tusa ma le 30% o tupe na faaaluina mo totogi a tagata faigaluega, o alauni mo tagata faigaluega ma le faaititia o le aoga o mea totino.

O le vaega o loo tusia ai le “Isi Tupe Faaalu”, e tusa lea ma le 7% o le aofaiga o tupe faaalu, o lo o aofia ai le totogiina o faasalalauga, totogi o le Suetusi, tupe pa’u mai mea totino ua le toe aoga, tupe totogi i Faletupe, tupe totogi mo lomiga tau fesootaiga, ma isi ituaiga tupe faaalu mo le faagaoioiga o le Ofisa.



Ata 6.1: Vaevaega o tupe faaalu mo le tausaga faaletupe faaiaina 30 Iuni 2010

6.3 Lipoti a le Suetusi

O le lipoti a le Ofisa Suetusi, o lo o faapipiiina atu i le Pepa Faapipii I o lenei lipoti. E le i mafai ona suesueina i le faatinoina o le galuega a le Ofisa o le Suetusi i le tausaga faaletupe faaiuina i le 30 Iuni 2010 le Faaputugatupe mo Avanoa Lautele ona e le i amataina lea Faaputugatupe.

7 Fuafuaga Faataatitia mo le tausaga faaletupe 2010-2011

Ua faamoemoe le Ofisa o le Pule Faatonu e faatau le faia lea o ni aoaoga aua le faaleleia o le tomai a le aufaigaluega, ma o se auala e ao ina faamautinoa ai le faaaauau o galuega faatino a le Ofisa i le lumanai.

O le **Vaega o Tupe ma Pulega** o le a tapenaina se Fuafuaga Mamao, Fuafuaga Autasi faapea ma le fuafuaga o gasologa o galuega ina ia mafai ona faailoa ai le auiliiliina o le punaoa a le Ofisa.

O le a ave foi le faamamafa i le sailia o seisi nofoaga e le gata i le faaitiitia ai o tupe faaalu i le totogi o le lisi o lo'o i ai nei ma mautinoa le lava lelei o le Ofisa mo tagata faigaluega faaopoopo. O le a faaleleia foi le Upegatafailagi e atagia ai le suiga fou o le Ofisa ia avea ma auala e fesootai ai ma tagata lautele. Ua i ai le faamoemoe e faia ni polokalame faalauiloa a le Ofisa o le Pule Faatonu ina ia faailoaina atu ai tiute ma galuega fai a le Ofisa ae maise aia tatau a tagata o lo o faaaogaina auaunaga tau fesootaiga i le suiga ua i ai nei faiga faatauva.

O le a ave foi le faamamafa i le faamautinoa o le lava tapena o le Ofisa aua galuega faatino faaopoopo mo Vaega o Meli ma Faasalalauga.

O le a faaaauau pea polokalame faaleaoaoga ina ia gasolo lelei galuega fai a le Ofisa pe a oo i le vaitaimi e suia ai le Pule Faatonu o lo o i ai nei.

O le a ave foi le faamamafa i le faaaogaina lea o se polokalame televave faaneionapo mo faamaumaga i totonu o le Ofisa aua le faaleleia o galuega fai.

O le a siitia le **Vaega o Tulafono** e ala i le faaleleia o le Tulafono o Fesootaiga faapea le faailoaina o nisi Tulafono fou. O le a tuufaatasia Tulafono Faatonutonu mo Faiga Faatauvaga ma le Fetaulaiga o Laina o Fesootaiga ma o le a faaleleia foi le Tulafono Faatonutonu mo Leitio.

O le a faia foi se polokalame e faaleleia ai le tomai i auala e foia ai feeseeseaiga ma o le a faaaogaina e le Ofisa e faaitiitia ai ni tagi e faaooina atu i le Komiti o Faamasino po'o nisi auala faa-le-tulafono e faasaga i faaiuga a le Ofisa.

O le **Vaega o Alaleo ma le Faainisinia** o le a faamaeaina le Faiga Faavae fou mo le Puleaina o Fusi o Alaleo faapea ma lona faatinoina ma o le a tagai faapitoa i le vaevaeina o fusi o alaleo faatasi ma ona totogi. O le faaaogaina o le 700 MHz ma le ono faaaogaina o i si tekonoosi fou e pei o le 4G o le a ave i ai le faamuamua.

O se tasi o galuega taua i le puleaina lea o alaleo o le faamae'aina lea ona tuufaatasi le Fuafuaga mo Fesootaiga i taimi o Faalavelave Faafuasei faapea ma lona faatinoina.

Ua faamaeaina le tele o galuega i lona fausiaina e aofia ai faatalatalanoa ma ua toe nei o le pasiaina ma lona faatinoga.

O le a fausiaina foi se Tulafono Faatonutonu mo le Faanumeraina o Telefoni pe a maea faatalatalanoaga ma o le a tagai ai le Ofisa i mataupu i le faaaogaina o numera i lona aotelega ma tuuina i lenei Tulafono Faatonutonu.

O le a tagai foi le Ofisa i se auala e faasoaina ma faaaogaina ai pou faasalalau i se tulaga lelei ina ia foia ai le faafitauli o le felavasai o laina o fesootaiga pe a faaaogaina pou o lo o iai nei. O le a tapenaina se Faiga Faavae ma e ono faia foi ma ni Tulafono Faatonutonu e siitia ai le tulaga o lo'o iai nei i le faaaogaina o pou faasalalau.

E faaauau pea ona mataitu le faaaogaina o auaunaga tau fesootaiga faapea ma le faatupuina ona faamalositia le faaaogaina talafeagai.

O le **Vaega e Mataituina Auaunaga** o le a ave le faamuamua i le faamaeaina o le Faiga Faavae mo Faiga Faatauvaga i vaega o Fesootaiga e ala i le iloiloina o maketi, o le pule tutoatasi mo le tuuina atu o se auaunaga, aemaise o mataupu faasolitulafono i taimi o tauvaga.

O le a faatinoina le Faiga Faavae mo Avanoa Lautele pe a faamaonia e le Kapeneta ma le Palemene, ma o le a aofia ai le faamautuina o ni auala e amataina ai le Faaputugatupe mo Avanoa Lautele, o le puleaina faapea ma ni saofaga moomia mo le faaputugatupe.

O le a faaauau pea ona tagai le Ofisa i faafitauli ma faitioga ma ave le faamamafa i le faaleleia o ni Taiala ma Alafua e foia ai nei feeseeseaiga.

O le a aofia foi i galuega faatino le atina'eina o ni Taiala ma ni Alafua mo le faamaoniaina ma le iloiloina o tau o fesootaiga ma o le a taumafai foi ina ia maua e i latou o lo o faaaogaina auaunaga o fesootaiga faamanuiga mai faiga faatauva e ala i le talafeagai o tau o fesootaiga.